

Museo Arkeologico a evalua e convenio relaciona cu e proyecto 'Nexus 1492'



E siman aki Museo Arkeologico Nacional Aruba (MANA) tin bishita di Profesor Dr. Corinne Hofman y Profesor Dr. Menno Hoogland, ambos di Universidad di Leiden. Nan ta na Aruba pa delibera riba e prome resultadonan di e 'MOU' cu Minister Oduber a firma aña pasa den nomber di Museo Arkeologico relaciona cu e proyecto 'Nexus 1492'.

E proyecto aki ta uno di investigacion cientifico pa fiha patronchinan di migracion den Caribe durante e periodo di prome contacto entre e Indjannan, Europeonan y Africanonan den e region di Caribe. E proyecto ta uno multi disciplinario y regional y ta conduci investigacion e.o. na Santo Domingo, Cuba, Guadeloupe y St. Kitts.

Na Aruba ta enfoca riba e descubrimientonan haci na e tereno di Santa Cruz 35, cual ta un sitio unico debi na e grafnan y artefactonan cu a haya akinan. Tanto e defuntonan como e material ta di e periodo di e prome contacto entre e Europeonan y e prome Arubianonan (Indjannan Caquetio). E aña cu a pasa a haci diferente analisis di 'Radio Carbon 14' y di 'Isotoop' riba e material. Tur analisis y otro gastonan di investigacion ta ser financia pa e proyecto cu ta subsidia pa Union Europeo. E prome resultadonan ta fascinante y awor arkeologo drs. Raymundo Dijkhoff di MANA y Profesor Dr. Menno Hoogland di UL, hunto cu otro expertonan, lo sigui investiga e material. Un prome relato y presentacion publico ta planea pa 24 di februari 2016 na Museo Arkeologico. Durante estadia di Dr. Hofman y Dr. Hoogland a probecha pa haci un bishita di cortesia na Prome Minister, cu ta tambe Minister di Ciencia y Desaroyo Duradero. Prome Minister tabata masha interesa den e topico y a ricibi cu placer un copia di e publicacion 'Managing our Past into the Future' for di

Profesor Dr. Hofman. Den e buki aki MANA ta participa cu un articulo di drs. Dijkhoff y Dr. Marlene Linville. Ambtenaar encarga cu maneho di MANA, mr. Arminda Franken-Ruiz BSc., a gradici Prome Minister pa su interes y disponibilidad pa ricibi e delegacion mirando cu Minister di Cultura ta den exterior. □

